



Politička organizacija građana "Naša stranka"
Branilaca Sarajeva 5/1, 71 000 Sarajevo
Telefon: 033 408 888; Fax: 033 408 881
E-mail: nasastranka@nasastranka.ba
Web: www.nasastranka.ba

ETIČKI KODEKS NAŠE STRANKE

I – UVODNE NAPOMENE

Član 1.

Sadržaj ovog kodeksa utvrđuje principe ponašanja i ophođenja za članove Naše stranke (u daljem tekstu: NS) prilagođene postojećem zakonodavstvu, Statutu NS, općim aktima NS, drugim aktima koje donose ovlašteni organi NS i najvišim etičkim načelima.

Član 2.

(1) Etičkim kodeksom NS (u daljem tekstu: Kodeks) uređuje se ponašanje članova NS u međusobnim odnosima i unutarnjoj komunikaciji, kao i ponašanje članova NS prema građanima i široj javnosti u okviru vanjske komunikacije, u skladu sa pravima i obavezama članova NS koje utvrđuje Statut NS.

(2) Cilj ovog Kodeksa je da se njegovom dosljednom primjenom uspostavi obaveza primjerenog ponašanja u unutarnjoj i vanjskoj komunikaciji članova NS pri obavljanju njihovih dužnosti propisanih Statutom NS, što će odražavati i snažiti međusobno povjerenje članova, kao i osnaživati povjerenje građana u moralne osobine, čestitost i poštenje članova NS.

Član 3.

Kodeks će utvrditi obavezu primjerenog ponašanja članova NS izabраниh ili imenovanih u zakonodavne ili izvršne organe vlasti, u stalna i povremena radna tijela u organima vlasti, kao i članova NS na rukovodnim i javnim funkcijama.

II – PRIMJENA KODEKSA NA ČLANOVE NS

Član 4.

Kodeks se odnosi na sve članove NS bez razlike na njihov status u organima ili tijelima NS.

Član 5.

(1) Članovi NS dužni su svoje obaveze obavljati u skladu sa Statutom NS i općim aktima u zavisnosti od toga kojem obliku organiziranja pripadaju ili koju funkciju vrše u organima NS. U obavljanju pomenutih obaveza, članovi NS moraju iskazivati maksimalan stepen kolegijalnosti, korektnosti, strpljenja, međusobne tolerancije, pomaganja i međusobnog poštivanja, ostvarujući komunikaciju prilagođenu najvišim moralnim načelima.

(2) Članovi NS slobodno iznose svoje stavove o pitanjima važnim za djelovanje i vođenje politike NS. Suprotstavljena mišljenja iznose se argumentirano, bez omalovažavanja tuđih stavova i prijedloga.

Član 6.

- (1) Članovi NS obavljat će svoje stranačke funkcije čestito, savjesno i odgovorno, uz naglašenu otvorenost i spremnost da odgovaraju za svoje odluke, djelovanja i ponašanja.
- (2) U obavljanju svojih funkcija, članovi NS će poštovati i uvažavati prava i ovlaštenja svih drugih članova te neće podsticati niti pomagati drugim članovima NS ili drugim licima koji nisu članovi, da prilikom vršenja svojih dužnosti krše principe uspostavljene ovim Kodeksom.
- (3) U obavljanju stranačkih profesionalnih funkcija član NS dužan je čuvati osobni ugled, ugled NS i povjerenje građana i članova u NS.

Član 7.

- (1) Članovi NS ne smiju vršiti nikakvo samoorganiziranje ili imati samostalno djelovanje koje za cilj ima destabiliziranje ili stvaranje teškoća organima NS u vršenju njihovih obaveza utvrđenih Statutom NS niti će svojom aktivnošću na bilo koji način nanositi štetu drugom članu ili članovima NS bez obzira na stepen političkog, odnosno kolegijalnog slaganja ili neslaganja sa njima. Svako takvo ponašanje je podložno disciplinskim mjerama u skladu s ovim kodeksom.
- (2) Članovi NS koji su za trajanja njihovog članstva pravomoćno osuđeni za teža krivična djela podliježu disciplinskoj mjeri isključenja iz NS. Članovi NS protiv kojih za trajanja njihovog članstva bude potvrđena optužnica za teža krivična djela, podliježu disciplinskoj mjeri suspenzije.
- (3) Disciplinskim mjerama će se sankcionisati svako otuđenje sredstava i imovine koje je u vlasništvu NS. Članu koji učini takav čin bit će izrečena disciplinska mjera isključenja, a nadležni organ NS će podnijeti krivičnu prijavu odgovarajućim organima gonjenja.
- (4) Disciplinskim mjerama će se sankcionisati svako manipuliranje prebivalištem ili mjestom boravka od strane člana NS, koje ima za cilj da član ostvari članstvo u organima općinskih, kantonalnih, regionalnih ili gradskih organizacija u sredinama gdje ne živi, koje su dužne da takve članove ne biraju u svoje organe što je u suprotnosti sa Statutom NS. Takvim članovima koji manipuliraju mjestom prebivališta ili boravišta radi ostvarivanja vlastitih ciljeva bit će izrečena disciplinska mjera.
- (5) Članovi NS dužni su poštovati simbole NS i prema istim se odnositi etično i upotrebljavati ih sukladno situaciji i na primjeren način.
- (6) Za svako isticanje simbola NS u javnom prostoru obavezno je tražiti odobrenje od strane rukovodstva lokalne organizacije, odnosno regionalne organizacije ukoliko lokalna organizacija ne postoji.

III – PRIMJENA KODEKSA NA IZABRANE I IMENOVANE ZVANIČNIKE NS

Član 8.

- (1) U obavljanju svojih funkcija, izabrani i imenovani zvaničnici NS iz člana 3. ovog kodeksa imaju obavezu služiti općem interesu, a ne isključivo ličnom interesu ili privatnom interesu pojedinaca ili grupa pojedinaca, sa ciljem postizanja direktne ili indirektno lične koristi.
- (2) Izabrani i imenovani zvaničnici NS iz člana 3. ovog kodeksa zalagat će se za zaštitu ljudskih prava i temeljnih sloboda, uz punu ravnopravnost svih građana i naroda BiH.

(3) Izabrani i imenovani zvaničnici NS iz člana 3. ovoga Kodeksa dužni su provoditi programske dokumente NS, koji su ponuđeni građanima radi zadobijanja njihovog povjerenja, uz puno poštivanje svih važećih zakona, podzakonskih akata, Statuta NS i općih akata NS koji su na snazi.

Član 9.

(1) Kada izabrani ili imenovani zvaničnik NS ima direktan ili indirektan lični interes u materiji koju razmatraju zakonodavni ili izvršni organi vlasti na bilo kojem nivou na koje je izabran ili imenovan ili ako je izabran ili imenovan u javne ustanove, preduzeća ili agencije, on će objaviti sukob interesa.

(2) Izabrani ili imenovani zvaničnici NS će se uzdržati od bilo kakve izjave ili glasanja u organima NS o pitanjima u vezi s kojima imaju neposredan ili posredan lični interes.

(3) U slučaju izbjegavanja obaveza iz stavova 1. i 2. ovoga člana, primjenom ovoga Kodeksa izabranom i imenovanom zvaničniku NS može biti izrečena odgovarajuća disciplinska mjera.

(4) Potvrđena optužnica zahtjeva od izabranog i imenovanog zvaničnika ostavku na sve funkcije na koje je izabran ili imenovan od strane organa NS-a.

Član 10.

Izabrani i imenovani zvaničnici iz reda NS nemaju pravo na bilo koju vrstu pregovora sa drugim političkim strankama i njihovim predstavnicima bez ovlaštenja nadležnog organa NS. Za neovlašteno vršenje pregovora sa drugim političkim strankama i njihovim predstavnicima bit će izrečena disciplinska mjera u skladu s ovim Kodeksom.

Član 11.

Svaki izabrani i imenovani zvaničnik iz reda NS dužan je provoditi političke stavove koje utvrđuje nadležni stranački organ, te s tim u vezi artikulirati svoju eventualnu diskusiju prilikom zasjedanja organa vlasti.

Član 12.

Izabrani i imenovani zvaničnici iz reda NS iz Člana 3. ovog Kodeksa, povinovat će se svim važećim propisima koji ograničavaju istovremeno obavljanje dvije ili više političkih funkcija. Oni neće obavljati funkcije, imati izabrane mandate ili službene dužnosti koje ih dovode u sukob interesa.

Član 13.

U pitanjima koja nisu obuhvaćena Politikama NS i utvrđenim stavovima organa, izabrani i imenovani zvaničnik će u obavljanju diskrecionih nadležnosti, dakle u djelovanju prema ličnom nahođenju, za svaki svoj prijedlog, davati iscrpno obrazloženje nadležnim organima NS kojima kao član pripada, uz navođenje svih činjenica na kojima je takav prijedlog zasnovan, posebno koja pravila i propisi su primijenjeni, uz ukazivanje na to kako takav prijedlog udovoljava tim pravilima i propisima. U nedostatku relevantnih pravila i propisa, izabrani ili imenovani zvaničnik NS će prije podnošenja prijedloga, uz odgovarajuće obrazloženje, zatražiti politički stav nadležnog organa NS u zavisnosti na kojem nivou vlasti obnaša svoju funkciju.

Član 14.

Izabrani ili imenovani zvaničnici iz reda NS će se u obavljanju svojih funkcija uzdržati od bilo kakvog ponašanja koje bi po važećem zakonodavstvu moglo da se okarakterizira kao koruptivno djelovanje.

Član 15.

Izabrani ili imenovani zvaničnici iz reda NS će se pridržavati budžetske i finansijske discipline koja obezbjeđuje ispravno upravljanje javnim prihodima, na način reguliran važećim zakonodavstvom. U obavljanju svojih dužnosti, izabrani ili imenovani zvaničnici neće učiniti ništa čime bi pronevjerili budžetska sredstva ili donacije.

Član 16.

Prilikom obavljanja svojih funkcija izabrani ili imenovani zvaničnici neće poduzimati mjere kojima bi sebi pribavili lične i profesionalne koristi u budućnosti, odnosno po prestanku obavljanja funkcije.

IV - ODNOSI SA JAVNOŠĆU

Član 17.

(1) Odnosi sa javnošću ostvaruju se na sljedeći način:

- Posebno organizirane press konferencije;
- Davanje izjava pisanim i elektronskim medijima;
- Posebno sačinjena saopštenja;
- Web portal www.nasastranka.ba;
- Službene stranice NS na društvenim mrežama i službene stranice lokalnih organizacija NS na društvenim mrežama;
- Organiziranje skupova na kojima se prenose politički stavovi NS.

(2) Učešće u odnosima sa javnosti imaju članovi NS koji imaju ovlaštenje nadležnog stranačkog organa koje može biti trajnog ili privremenog karaktera. Članovi NS koji nemaju ovlaštenje nadležnog stranačkog organa, bilo kojeg nivoa, nemaju pravo u ime NS uzeti učešće u odnosima sa javnošću.

(3) U javnim nastupima u kojima ne predstavlja NS, a koji se na bilo koji način odnose na poslove, članstvo i aktivnosti iz djelokruga NS, član NS ne smije iznositi podatke koji bi mogli naštetiti ugledu NS i narušiti povjerenje građana i članstva u rad organa NS.

(4) U javnim nastupima u kojima ne predstavlja NS i koji nisu tematski povezani sa NS, član ne treba odobrenje stranačkog organa za nastupe u medijima, ali je pri tome dužan paziti na ugled NS i osobni ugled.

(5) Član ne smije zloupotrijebiti informacije o djelovanju i radu organa NS čiji je član, odnosno odavati podatke koje je saznao za vrijeme obavljanja svojih funkcija.

Član 18.

Osim pomenutih načina iz člana 17. ovoga kodeksa, dio učešća u odnosima sa javnošću može se ostvariti putem društvenih mreža, različitih individualnih blogova ili internet stranica. Svaki član NS ima pravo na ovaj vid ostvarivanja komunikacije sa najširojom javnosti. Iznošenje stručnih stavova iz naučne oblasti pojedinog člana je dozvoljeno.

Član 19.

(1) Korištenje društvenih mreža, posebnih blogova ili internet stranica može sadržavati lične stavove člana NS koji nisu političkog karaktera, a odnose se na različite aspekte društvenog,

naučnog, kulturnog ili sportskog života. U slučaju da se prilikom korištenja društvenih mreža iznose politički stavovi, oni moraju biti usklađeni sa Statuom NS, Politikama NS, ranije utvrđenim političkim stavovima stranačkih organa na bilo kojem nivou organiziranja. U slučaju da se društvene mreže koriste za iznošenje političkih stavova koji odudaraju ili nisu u skladu sa politikama NS, tada se tom članu mogu izreći disciplinske mjere.

(2) Prilikom korištenja društvenih mreža, ličnih blogova ili internet stranica svaki član NS obavezan je izbjeći bilo koji vid vrijeđanja, omalovažavanja bilo kojeg drugog člana NS ili stranačkog organa kao i nestranačkih pojedinaca i kolektiva te posebno pažnju posvetiti zaštiti ugleda NS. Ako se takva aktivnost pojavi, tada se mogu izreći odgovarajuće disciplinske mjere.

V - PRAVILA KOJA VLADAJU U IZBORNOJ KAMPANJI NA LOKALNIM, OPĆIM ILI UNUTARSTRANAČKIM IZBORIMA

Član 20.

(1) Izborna kampanja može se odnositi na lokalne ili opće izbore, koji se organiziraju u skladu s Izbornim zakonom Bosne i Hercegovine, kao i na unutarstranačke izbore NS koje raspisuje nadležni stranački organ.

(2) Prilikom odvijanja izborne kampanje za lokalne ili opće izbore, svaki član NS dužan je uzeti aktivno ili pasivno učešće u izbornoj kampanji. Tokom tog učešća u izbornoj kampanji, strogo je zabranjeno vrijeđanje i omalovažavanje bilo kojeg kandidata iz reda NS i ostalih kandidata na listama koji učestvuje na lokalnim ili općim izborima. Strogo je zabranjen rad, u kojem kandidati na kandidacijskim listama za lokalne ili opće izbore, otvoreno ili tajno rade protiv drugih kandidata NS sa kandidacijskih listi, kako bi time sebi ili drugome pribavili dovoljno glasova da budu izabrani u zakonodavne organe vlasti. Takva aktivnost bit će predmetom disciplinske mjere.

(3) Isto tako, prilikom izborne kampanje za unutarstranačke izbore, kandidati čija je kandidatura ovjerena nemaju pravo koristiti elemente vrijeđanja, omalovažavanja ili diskreditacije drugih protivkandidata niti bilo kojeg drugog člana NS.

(4) Članovi NS koji se nalaze na kandidatskim listama, a rade vlastitu promotivnu kampanju, dužni su koristiti uspostavljeni vizualni identitet NS te po završetku predizborne kampanje svoje promotivne materijale uredno ukloniti.

VI – SEKSUALNO UZNEMIRAVANJE

Član 21.

- (1) U oblike nedozvoljenog ponašanja za članove NS spada i uznemiravanje na seksualnoj osnovi.
- (2) Seksualno uznemiravanje je svaki neželjeni oblik verbalnog, neverbalnog ili fizičkog ponašanja seksualne prirode kojim se želi povrijediti dostojanstvo osobe ili grupe osoba, ili kojim se postiže takav učinak, naročito kad to ponašanje stvara zastrašujuće, neprijateljsko, degradirajuće, ponižavajuće ili uvredljivo okruženje.
- (3) Pod neželjenim oblicima verbalnog ponašanja iz stava (2) smatraju se:
 - a) upućivanje verbalnih i fizičkih prijedloga seksualne naravi drugoj osobi;
 - b) zahtijevanje neželjenog fizičkog kontakta;

- c) iznošenje šala ili aluzija koje su seksualne prirode, uključujući opaske u vezi spola i seksualne orijentacije;
 - d) izrugivanje i ismijavanje na spolnoj osnovi sa seksualnom konotacijom;
 - e) pisanje seksualno eksplicitnih ili sugestivnih poruka ili pisama;
 - f) flertovanje i zahtijevanje spolnog odnosa ili seksualnih usluga;
 - g) širenje glasina seksualne naravi;
 - h) prijetnje upućene osobi koja odbija udovoljiti seksualnim ponudama.
- (4) Pod neželjenim oblicima neverbalnog ponašanja iz stava (2) smatraju se:
- a) gestikulacije, znakovi i insinucije koje upućuju na imitaciju seksualnog odnosa;
 - b) izlaganje druge osobe bilo kojem materijalu eksplicitnog, uvredljivog ili uznemirujućeg sadržaja.
- (5) Pod neželjenim oblicima fizičkog ponašanja iz stava (2) smatraju se:
- a) neželjeni fizički kontakti te dodiri seksualne naravi;
 - b) neželjena invazija ličnog prostora;
 - c) fizički nasrtaji i napadi.

VII – ETIČKA KOMISIJA

Član 22.

(1) Etička komisija NS je organ NS koji daje mišljenja o sadržaju i načinu primjene Etičkog kodeksa te promiče etička načela i standarde u NS.

(2) Etička komisija NS imenuje se od strane Kongresa NS.

Član 23.

(1) Etička komisija je neovisna u odlučivanju.

(2) Način rada, postupanja i glasanja, Etička komisija utvrđuje poslovnikom o radu.

(3) Etička komisija prati primjenu Etičkog kodeksa NS, promiče etičko ponašanje u međusobnim odnosima članova te odnosima članova prema građanima, razmatra žalbe na odluke Predsjedništva NS po pitanju kršenja i nepoštivanja odredbi Statuta i Etičkog kodeksa NS.

Član 24.

Etička komisija obavlja sljedeće poslove:

- odgovara na prijave organa podnesene zbog toga što u roku od 30 dana od zaprimanja žalbe na odluku Predsjedništva NS nisu dobili odgovor na istu ili u slučaju kada podnositelj žalbe nije zadovoljan odlukom;
- provodi postupak ispitivanja osnovanosti žalbe na odluku Predsjedništva NS;
- donosi odluku po žalbi;
- daje mišljenja vezana uz sadržaj i primjenu Etičkog kodeksa;
- prati primjenu propisa na području etičkog postupanja članova NS te predlaže njihove izmjene i dopune;
- promiče etičke standarde u NS.

Član 25.

(1) Podnošenje žalbe Etičkoj komisiji NS za djelovanje ili aktivnost člana ili članova NS koje nije u skladu s ovim Kodeksom imaju pravo svi organi i članovi NS na bilo kojem nivou organiziranja, kao i pojedinci koji nisu članovi NS. Žalba mora sadržavati tačne elemente povrede ovog kodeksa sa dokumentiranim dokazima o takvom djelovanju pojedinog člana ili članova NS za koje se traži provođenje postupka.

(2) Etička komisija provodi postupak ispitivanja osnovanosti žalbi te priprema izvještaj o provedenom postupku.

(3) Etička komisija dužna je u roku od 30 dana od dana primitka žalbe na odluku Predsjedništva NS provesti postupak ispitivanja osnovanosti žalbe te pripremiti odgovor podnosiocu pritužbe.

Član 26.

U postupku ispitivanja osnovanosti pritužbe, Etička komisija zatražit će pisanu izjavu člana na kojeg se odnosi pritužba, izjave drugih osoba koje imaju neposredna saznanja o predmetu pritužbe te poduzeti i druge radnje potrebne za utvrđenje činjeničnog stanja, uključujući i saslušanje članova.

Član 27.

U slučaju dvojbe o tome predstavlja li neko ponašanje člana NS povredu Etičkog kodeksa, Etička komisija zatražit će mišljenje Glavnog odbora NS.

VIII - DISCIPLINSKE MJERE

Član 28.

U skladu sa Statutom NS i ovim kodeksom, Predsjedništvo i Etička komisija izriču sljedeće disciplinske mjere:

- izvinjenje;
- opomena;
- opomena pred isključenje;
- suspenzija;
- isključenje.

Član 29.

(1) Isključenje se izriče članu NS koji je počinio težu povredu ovoga kodeksa, odnosno Statuta NS, što utvrđuju Predsjedništvo NS u prvostepenom, odnosno Etička komisija NS u postupku po žalbi na odluku Predsjedništva NS.

(2) Za ponovljeno djelo za koje je izrečena disciplinska mjera opomene, opomene pred isključenje ili suspenzije, može se izreći i disciplinska mjera isključenja o čemu odlučuju Predsjedništvo NS u prvostepenom, odnosno Etička komisija NS u postupku po žalbi na odluku Predsjedništva NS.

(3) Ukoliko se čin izvinjenja desi prije izricanja disciplinske mjere, nadležni organi mogu ga tretirati kao olakšavajuću okolnost.

(4) Odluka o izricanju disciplinske mjere izvršava se tek kada postane pravosnažna.

Član 30.

Ovaj kodeks stupa na snagu narednog dana od dana donošenja na sjednici Glavnog odbora NS i dostavlja se svim članovima NS u elektronskoj formi.

Član 31.

Riječi i pojmovi koji imaju rodno značenje korišteni u ovom Kodeksu odnose se jednako na muški i ženski rod, bez obzira jesu li korišteni u muškom ili ženskom rodu.

Predsjednica Glavnog odbora
Sabina Čudić

Broj:

Sarajevo, _____.____.2019. godine